



Aqqalu C. Jerimiassen

UKA 2025/94-1

Atassut

16. Oktober 2025

**Isertitat annertussusaat malillugit utoqqalinermi soraarnerussutisiat ilanngarneqartarunnaarlutilluunniit atorunnaarsinneqartarunnaarsillugit, Naalakkersuisut utoqqalinersiaqarneq pillugu Inatsisartut inatsisaannut allannguutissatut siunnersuummik suliaqarnissamik peqquneqarnissaannik Inatsisartunut aalajangiiffigisassatut siunnersuut. Allaannguutissatut siunnersuut UKA 2026-mi saqqummiunneqassaaq.**  
(Inatsisartunut ilaasortaq Mariane Paviassen Jensen , Inuit Ataqtigii)

Siunertaq ilisarnangaalerami, siunnersuutip imaa atuarlugu assut ilisarnartortaqarpoq, tassami takusinnaasanni uani siunnersuuteqartoq sioqqullugu taamatorluinnapajaaq Atassummit siunnersuut qaqinneqarnikuummat. Taannalu qaqinneqarnerminit qinigaaffiit marluk sinnilaarsimalerpai, siunnersuutaasorlu eqqartorneqaqqaarsimavoq inatsisartut ukiaanerani ataatsimiinnerat 2019, 25.sep.

Qulequtarlu imaalluni: *“Utoqqalinermi siusinaartumillu pensionisiat allanik isertitaqarnerit nassatarisaannik annikillineqartarunnaarnissaasa kinguneqaataannik pillugit Naalakkersuisut kingusinnerpaamik UPA2021-mi nassuiaammik saqqummiussinissaannik peqquneqarnissaat pillugu Inatsisartuni aalajangiiffigisassatut siunnersuut. Inatsisartunut ilaasortaq Siverth K. Heilmann, Atassut”.*

Qujavugullu maanna Inuit Ataqtigii inatsisartunut ilaasortaataat Mariane Paviassen Jensen taamatorluinnapajaaq imaqtumik saqqummiussaqaamat.

Nuannernerpaartaatulli taasinnaasarput tassaagunarlu, Inuit Ataqtigii 2019-imi inatsisartut ukiaanerani ataatsimiinneranni “Aataqqii” Siverth K Heilmann-ip Atassummiit siunnersuutigisimasaanut itigartitsinikuugaluarlutik, maanna taamatorluinnaq siunnersuuteqarsinnaalersimmata isumaqtigilluinnakkatsinnik.

Ukiut arlallinaasiit tassuuna siuaattooqqasimaneq Atassummiit takuneqaannarsinnaagunarpoq, siunnersuutigut siusippallaalaakkut qaqikkatsigit itigariarlutik allamit partiimit qaqinneqartuarnera partiitsinni siulittaasorisimasatta Aataqqiip eqqaajuartarsimavai.

Naalakkersuisullu maanna akissuteqaatigisaminni erseqqissaaqqillutik uani qinigaaffimmi anguniarneqartussat erseqqilluinnartumik nassuiaatigivaat.

Partiit sisamaavugut assigiinngissinnaaqisut naalakkersuisooqtigiiusut, naalakkersuisooqtigiinnissamullu isumaqtigiissuteqarsimanitsinni ilaatigut soraarnerussutisitaqarnermik aqqissuusseqqittariaqarneq pingaaruteqarluinnartumik inissisimatinneqarsimalluni.



Asuliinnanngilarmi ukiorpanni Atassut taaniarneqartarsimammat utoqqaat partiiattut, Atassummiillumi qangaaniilli ilisarnaatigiuartarparput, utoqqartagut pineqartillugit isummatta isertuaatsumik ersarissumillu annittuarterneri.

Tassanilu ukiorpaalussuit ingerlanerannit utoqqartatta pitsaanerusumik atungaqarnisaannut tunngatillugu ilaatigut aningaasanut inatsisikkut isumaqatigiinniarternermi qaqitaqartuartsimanitsigut.

Taanna soorunami anguniakkatsinni allanngorunnaangilaq, maannali naalakkersuisooqataanitsinni akisussaaffeqarpugut pisussaaffeqarluta, partiit naalakkersuisooqatigisagut naapiffiginnaaffiini qanoq naaperiartassanerlutigit.

Taamaammat naalakkersuisut akissuteqaatigisaminni erseqqissareermassuk, naalakkersuisooqatigiinnissamullu isumaqatigiisummiittut eqquutsinnissaanut pisussaaffeqaratta, Atassummiit naalakkersuisut allannguutissatut siunnersuutigisaat taperserlugu, siunnersuut aappassaaneerneqartigani Ilaqutariinnermut Peqqissutsimullu ataatsimiitsitaliamut innersuupparput.